



Relatu

# L'Anguleru

## ¿Quién ye L'Anguleru?

*L'Anguleru*

*¿Quién ye L'Anguleru?*

L'ANGULERU

# ¿Quién ye L'Anguleru?

L'Anguleru ye'l Papá Noel asturianu, esta ye la forma más rápida de definilu pa que toos lo entendamos.

Va munchísimos años yeren les neñes y neños de L'Arena los únicos que-y pidíen regalos pero cuando los demás rapacinos y rapacines d'Asturies se foron enterando de la maxa navidiega de L'Anguleru entamaron a manda-y los sos pidimientos, y agora son milenta d'ellos los que creyen na maxa de L'Anguleru per toa Asturies y más p'allá.

L'Anguleru sal de la Mar de los Sargazos nel entamu d'avientu y llega a Asturies dellos díes enantes de la Nuechebona. Dende esi momentu, percuere los 78 conceyos a la gueta los sos aperios y preseos de trabayu, porque va necesitalos la tarde de la Nuechebona y la mañana de la Navidá. En Llena recueye la cebera pa la so estancia n'Asturies, en Llaviana la chalana, n'Uviéu la música que-y fairá'l viaxe más prestosu, en Mieres el fueu máxicu de la Navidá, n'Avilés el Nataliegu, en Xixón les cartes que-y manden permunchos neños y neñes a la oficina correos de L'Anguleru... y asina en caún de los conceyos.

Conforme foi medrando la so zona d'actuación, L'Anguleru foi precisando d'ayudantes, que reciben el nomatu de Maestros Llendadores. El Faroleru en Candás, los Ruleros Xesús y Lolina n'Avilés, los Ocleros en Villaviciosa, los Tritones de L'Infiestu na zona oriental d'Asturies, y que s'encarguen de revisar l'estáu de los ríos d'Asturies pa que la chalana de L'Anguleru pueda percorrer en Navidá tol Principáu. Estos ayudantes échen-y un gabitu na entrega de regalos nes fasteres nes que viven y son tamién máxicos como L'Anguleru. Y ye que cada añu L'Anguleru busca nuevos Llendadores per toa Asturies, y tu pues ser ún d'ellos.



L'Anguleru conviértese nun personaxe máxicu gracies a la lluz que se despiende de quemar el Nataliegu, un tueru de carbayu que'l so fueu caltién la maxa de la Navidá. Pa prender el Nataliegu, L'Anguleru necesita'l fueu que se consigue de prender los caricoses de carbayu que los mierenses rescaten cada añu de la foguera de San Xuan. Col fueu que sal de quemar esos caricoses L'Anguleru priende'l Nataliegu en L'Arena la tarde de la Nuechebona, pa qu'asina él y tolos Maestros Llendadores d'Asturies se conviertan en seres máxicos de la Navidá.

Esta ye, en resume, la hestoria de L'Anguleru. Si quies seguir conociendo más sobre él y sobre la Navidá asturiana visita'l web de L'Anguleru na direccón [www.languleru.com](http://www.languleru.com)

**Garabuxada**  
Asociación Cultural  
[www.garabuxada.com](http://www.garabuxada.com)



Collabora  
Dani Menéndez - Serviciu de Normalización Llingüística de Grau ya Candamu

2